



I pîts a jerin dividûts in doi.

La ponte a saltave fûr dal cret, libare, frede, pronte a cjapâ il svol.

Daûr, invezit, si jere ancjemò tal sigûr, ben plantâts, fers, tacâts sul slis da pierie.

I voi sierâts a fasevin a gare cul nâs e cu lis orelis, cirint di vinci il prin premi des sensazions: il cidinôr messedât cu l'aiar fresc, berdeât intor dal pinsîr.

Aromai al jere dibant pensâ indaûr. Ducj i modons che a vevin fât sù la sô vite, cundut che a fos curte, a jerin stâts butâts par tiere e slargjâts par ben, come par volêju distacâ di ogni sperance.

La ponte dai pîts a jere rivade a trê cuarts.

I braçs ben slargjâts a disevin al cuarp che dut al jere pront.

Il cret al jere avonde alt. Sot al jere il nuie, al pensave Martin, o pûr il dut.

Il zovin al sintive l'aiar che a bugadis i patafave la muse.

Cumò al vignive il dificil.

Sô mari, so pari, i siei fradis, la none vistude simpri di neri cul façolet sul cjâf.

Zûcs cui amîs, rimpinâsi sui arbui, butâsi intal flum, o pûr cori framieç lis cumieris da blave.

No, Martin, no stâ lassâti cjapâ dai pinsîrs. La decision je cjapade!

Cumò ancje il nâs si met par traviers...

I profums da stale, dal fen a pene taiât, il forment slargjât intal solâr.

L'orâr brusât intal spolert prime dal rogan, l'incens da glesie, la polente ta cjalderie.
Ten dûr Martin, al mancje pôc. Dome i talons a son tacâts al cret, a la vite!
No bisugne jessi masse braurôs, mai! Soredut in chescj moments!
Cussì al pensave Martin. I pinsîrs e i profums a vevin dât la lôr ultime sborfade.
A mancjavin dome i suns, forsit i piês di dismenteâ.
La cjampanute da buteghe, il cricâ dal fûc, la cõt su la lame dal falcet.
Lis feminis che a cjantin lis litaniiis, il gjal a buinore, la fieste in place.
La vôs di sô sôr a pene nassude, chê dal nono che al porconave, chê di sô mari cuant che lu indurmidive.
La vôs di so pari che lu clamave...
- Martin! Martin!
Il frut si jere ingropât.
Po dopo al veve spalancât i voi.
- Martin, smonte dal muret, se no tu colis ta ledre. E jo no ven a cjoliti!
- Si, pai, cumò o smonti. O svolarai une altre volte.

di Massim Furlan